

682.821
0824
:20

豫河續志

陳善同題

外編



豫河續志外編

美哉禹功順水以行導河積石自西徂東播爲九河以入於海
水有攸歸萬世利賴殷周以降壅川壑鄰開陌決防重以羸秦
水失其道隄障難固其後百變終非故瀆王景賈魯治河最精
導流寬勢不與水爭逮及明季其謀最拙逼水南行時壅時決
河經豫省橫亘其中厯數十縣如帶之通冊籍所傳綴其變遷
披圖按牒亦有資焉

夏

商

周

秦

漢

魏晉

南北朝

唐

宋

元

金

明

豫河變遷攷

夏

河自積石東漸紆迴近萬里始入於海歷數千年之久變更遷徙靡有定止自大禹底定以來其變徙之在豫境者尤爲最鉅故欲攷歷代之河勢當就夏書所載詳識全河之源流以資攷證案河自積石東北入甘肅境蘭州城北迤東經金鄉縣入靖虜衛又東經寧夏中衛南又東經寧夏衛東又東過榆林西境經古三受降城又東折而南經榆林之東又南經府谷縣東又經神木州南入葭州境經州城東東岸爲山西河曲保德州及興縣境又南經吳堡縣綏德州東東岸爲山西臨縣永寧州及寧鄉縣界又南經青澗縣東又南經延長縣及延川縣東東岸

爲山西之石樓及永和太寧縣境又南經宜川縣東東岸爲山西河津及榮河臨晉縣西境又南經朝邑縣東又南經華陰縣東北東岸爲山西蒲州又南過雷首山乃折而東至是始入豫境禹貢所謂導河積石南至於華陰者也

禹貢錐指曰以今輿地言之河自大積石山東北流逕陝西西寧衛西南塞外至河州西七十里入塞又東北逕州北合灘水又東北合池水又東北逕蘭州西南湟水合浩疊水自西來注之又東北逕州北又東北逕金縣北又東北逕靖遠衛北又東北逕寧夏中衛南又東北逕靈州所北折而北逕寧夏衛東南又北逕平羅所東又北逕榆林衛西出塞逕廢豐州西折而東逕三受降城南折而南逕廢勝州東入塞其東岸則平鹵衛又

南逕府谷縣東其東岸則河曲保德縣迤西逕神木縣南又南逕葭州東其東岸則興縣又南逕吳堡縣東又南逕綏德州東其東岸則臨縣永寧州寧鄉縣又南逕清澗縣東又南逕延川縣東又南逕延長縣東其東岸則石樓縣永和縣大寧縣又南逕宜川縣其東岸則吉州鄉寧縣又南至韓城縣東北龍門山在焉其東岸則河津縣此導河積石至於龍門之所經也

又曰河自韓城縣龍門山南流與汾水合又南逕郃陽縣東其東岸則滎河縣臨晉縣又南逕朝邑縣東又南至華陰縣東北與渭水合其東岸則蒲州又南逕雷首山西至潼關衛北折而東是爲河曲此河水南至華陰之所經雍州文所稱龍門西河者也

自雷首山東折經豫之閔鄉縣靈寶縣北北岸爲山西芮城縣南境又東經陝州城北又東經澠池縣及新安縣北北岸爲山西平陸及垣曲縣境河水分流包山而過俗名三山門水中若柱謂之砥柱又東經河南府北北岸爲濟源縣境又東經孟津縣北北岸爲孟縣之南境至是兩岸平闊其流漸漲決溢遷徙自此而起禹貢所謂東至於底柱又東至於孟津者也

禹貢錐指曰以今輿地言之河自潼關衛北折而東逕閔鄉縣北又東逕靈寶縣北其北岸則芮城縣又東逕陝縣北其北岸則平陸縣又東過底柱唐趙冬曦三門賦序曰砥柱山之六峯者皆生河之中流蓋夏后之所開鑿其最北有兩柱相對距崖而立卽所謂三門也次於其南有孤峯揭起峯頂平闊夏禹之

廟在焉西有孤石數丈圓如削成復次其南有三峯東曰金門
中曰三堆西曰天柱河水從黃老神前東流湍激蹙於蝦石折
流而南激於三門苞於廟山乃分爲四流淙於三峯之下抵於
曲隈會流東注加以兩崖夾水盤紆激射天下罕比此河水東
至底柱之所經也

又曰河水自陝州又東逕澠池縣北其北岸則曲垣縣又東逕
新安縣北又東逕孟津縣北其北岸則濟源縣孟縣此河水又
東至孟津之所經也

自孟津而東經鞏縣北北岸爲温縣境又東爲成臯汜水而北
岸則爲洛汭又東爲滎陽滎澤廣武山脈至此而伏河流益闊
其勢益急在汜水鞏縣之間爲洛水所歸其北岸則沁水經澤

州懷慶武陟過洛汭而亦注於河是爲黃河沁河之結點又東經原武陽武之北北岸則爲獲嘉新鄉又東則經酸棗胙城而北經黎陽滑縣以至於大伾禹貢所謂東過洛汭至於大伾者也

禹貢錐指曰以今輿地言之河水自孟津縣北又東逕鞏縣北洛水入焉其北岸則溫縣濟水入焉又東逕汜水縣北又東逕滎陽縣北其北岸則武陟縣沁水入焉又東逕河陰縣北又東逕滎澤縣北其北岸則獲嘉縣又東逕原武縣北又東逕陽武縣北又東逕延津縣北又東逕胙城縣北其北岸則新鄉汲縣又東北至濬縣西南古宿胥口大伾山在其東北其南岸則滑縣此河水東過洛汭至於大伾之所經也

黎陽之間醜爲二渠自宿胥口始一北流爲大河一東流爲漯
川東北至千乘入海自臨漳北始出豫境北過降水經廣宗鉅
鹿至於大陸大陸迤東經冀州之堂陽信都棗強以至鬲津鬲
津爲黃河播爲九河之一九河者一曰徒駭北流衡漳二曰太
史經德州滄州臨津縣之西三曰馬頰在安德縣南五十里平
昌縣南十里卽篤馬河是四曰覆釜在阜城東光西北至海豐
入海五曰胡蘇在無棣臨津六曰簡在貝州厯亭七曰絜亦在
臨津八曰鈞盤在樂陵縣東五十里九曰鬲津亦在樂陵九河
下至滄州同爲一河河尾相合以相逆受故曰逆河經章武靜
海津沽驢城碣石以入於海禹貢所謂北過降水至於大陸又
北播爲九河同爲逆河入於海者也

循禹之跡自滎陽上溯西北河流雖遠然起伏寬狹多以地勢高厚山形束縛故數千年來無大變遷自滎陽以東直至臨漳內黃之間蓋皆在豫境之內地勢平廣水得暢行然湍悍洶湧不可制止故以洺水沁水分其勢以暢其流又醜二渠導使北行復以九河緩其衝蓄其力始得順軌以入於海蓋亦已難矣故豫境河流之變遷實地勢有以使然而順其性以維之緩其衝而防之尤人力之所不容緩者也

禹貢錐指曰以今輿地言之河自濬縣西南折而北歷內黃湯陰安陽臨漳魏縣成安肥鄉曲周平鄉廣宗至鉅鹿縣大陸澤在焉此卽禹河北過降水至於大陸之故道也

商

商之先世有侯冥能勤其官循禹所施不改其度故河自神禹底績四百餘年無大河患成湯纘緒奄有天下都南西亳仲丁遷都於囂囂爲今滎澤縣西北因土山爲城然以時有河患至河亶甲元祀徙居於河北之相有商一代雖小有患然其道迄無變異

周

周定王五年河徙故瀆自禹治水帝堯八十載告厥成功至是凡一千六百七十六年河始決宿胥口東徙漯川卽爲禹醜二渠之一禹河舊蹟由大伾之西而北流河徙後由大伾之南而東流於是北過降水之故道遂堙徙漯川後經長壽津東北至成平成平卽今之交河合於漳水復歸禹河故道又蔡傳云定王五年河徙砠礫胡渭禹貢錐指大昌禹貢論皆無砠礫字當以蔡傳爲誤又按書正義引春秋緯寶乾圖云移河爲界在齊呂填遏八流以自廣公羊疏引尙書中候云齊桓之霸遏八流以自廣蓋齊桓公時九河旣同爲一桓公卒於襄王九年戊寅至定王五年己未四十二年蓋下流旣壅水行不暢上流乃決

理所當然由此觀之河之徙雖始於定王而其因實肇於襄王時也

周威烈王十三年晉河岸崩壅龍門至於底柱三日不流龍門底柱之間皆高山崇阜河雖壅而其流不徙

禹貢錐指曰大河自宿胥口徙流至成平合漳水復歸禹河故道又東北歷浮陽參戶平舒至章武入海以今輿地言之濬縣滑縣開州內黃清豐南樂大名元城冠縣館陶堂邑清平清河博平高唐平原德州景州吳橋東光交河滄州青縣靜海天津諸州縣界中皆周定王五年至西漢末大河之所行也定王五年歲己未下逮王莽始建國三年辛未而北瀆遂空凡六百七十二歲

秦

秦孝公用商鞅之法廢井田闢阡陌引河水以灌田始皇元年

復用韓人鄭國之策鑿涇水自仲山

卽今陝西省西
安府涇陽縣

爲渠傍北

山歷三原富平蒲城東注洛中河流至是遂加入涇水一支禹
修故堤十去五六而豫境獨未大變者以河闊溜急不敢操切
從事也

始皇二十二年秦王賁伐魏引河溝以灌大梁所謂河溝者卽
鴻溝亦曰浪蕩渠渠在浚儀縣北自王賁引水東南出以灌大
梁遂謂之梁溝於是水出縣南而不經其北浚儀故縣卽今開
封府西北卽梁滅魏所都也

寺法新示

子法參透

入

漢

漢孝文帝十二年冬十二月河決酸棗東潰金隄酸棗屬陳留郡秦拔魏置縣地多酸棗因以爲名金隄在東郡白馬縣界一曰千里隄白馬縣屬滑州太守王尊治之

武帝元光三年春河水從從頓邱東南流入渤海夏復決濮陽瓠子注鉅野通淮泗汎郡十六案頓邱卽澶州濮陽清豐兩縣今並屬直隸大名府渤海卽滄棣霸濱等州之地直至元封二年始塞宣房導河北行復禹二渠之舊迹宣房塞後河復北決於館陶河水別出爲屯氏河東北至章武入海蓋自文帝至此四十餘年始遷入故道而又多出屯氏支河

元帝永光五年河決清河靈鳴犢口而由館陶別出之屯氏河

遂絕

成帝建始四年河決東郡金堤凡灌四郡三十二縣遣大司農
非調均錢穀存給所灌之郡謁者發河南以東漕船五百艘徙
民避水其後鴻嘉四年渤海清河信都河水溢按信都卽冀州
信都縣禹河北過降水卽此亦曰枯淥渠西南自南宮縣界入
平帝時汴渠決敗未修新莽始建國三年河決魏郡泛清河以
東數郡魏郡卽相州今彰德府北

明帝永平十三年王景修汴渠成詔稱自汴渠決敗六十餘歲
今旣築隄理渠絕水立門河汴分流復其舊迹案汴渠在河南
府河陰縣今屬滎澤縣南二百五十步亦名瀆蕩渠禹塞滎澤
開渠以通淮泗漢書所稱滎陽漕渠今磔谿口是也自王景治

汴渠成後久無河患至順帝陽嘉中又自汴口以東緣河積石
爲堰通渠皆曰金隄靈帝建寧中增修石門以遏渠口水盛則
通注津耗則輟流河水又東經八激隄北八激隄者安帝永初
七年令謁者泰山于岑於石門東積石八所皆如小山以捍衝
波謂之八激隄又北經支濟水與河合流東至磔谿南東出過
滎陽王景樂浪人故又有稱汴渠爲樂浪渠者

王莽始建國三年河決魏郡莽以冢墓在元城河決東去元城
無憂故不塞而河遂自元城東出館陶東武陽絕漯水而東北
至高唐又絕漯水東北入海而大禹播爲九河入海之道遂日
就堙

禹貢錐指曰以今輿地言之滑縣開州觀城濮州范縣朝城陽

穀在平禹城平原陵縣德平樂陵商河武定青城蒲臺高苑博興利津諸州縣界中皆東漢以後大河之所行也

魏晉

魏晉之初與東漢河道無大變異河經黎陽宿胥東行經白馬北平陽南開州北又東經東武陽濮陽頓邱東昌在平博平高唐之間合濟水漯水仍自利津入海而豫境自滎澤以西之故道無所變更晉泰始四年九月青徐兗豫四州大水其後徐水歸於淮豫水歸於河泰始七年六月大霖雨豫境之河洛伊沁等水皆溢自滎澤西水勢散漫其後雖復歸河道而豫境沁河洛河之決溢實始於此至惠帝元康八年秋荆豫徐揚冀五州復大水兗之水溢復歸故渠河道亦無變異

南北朝

自王景治河作汴渠障河使北行入故道梁楚復寧故厯南北朝迄無大患惟時多征奪宇文氏於湖城北置閭鄉郡爲黃河入豫境所經之地由是以東後魏置陝州屬之宏農郡而澠池一縣凡兩更易後魏以之爲郡而後周以爲河南郡大象時復廢郡屬洛州新安縣後魏以之屬河南而東魏以爲新安郡河南府後魏以爲洛州置河南尹孟縣則爲河陽縣自東晉建三城東魏築東澗城河陽橋亦屬於此視爲重鎮而唐初河患多在於此

唐

唐自太宗貞觀十一年秋七月始有河患是月大雨穀洛溢入洛陽宮九月河水復溢壞陝州河北縣毀河陽中渚

高宗永淳元年河溢壞河陽橋橋爲晉杜預所築是年冬修復仍在孟縣之間

武后長壽元年

是年改元如意

河復溢壞河陽縣城

玄宗開元十四年秋七月河南北大水懷州相州汲郡並遭水患八月河決魏州河北水勢乃漸殺

憲宗元和八年河溢瓠子泛滑州羊馬城時滑州使薛平魏博使田弘正徵役萬人於大伾黎陽間開濬黃河故道經黎陽東行合於禹瀆宿胥名爲新河自是以後滑州無河患者三十年

文宗開成三年河決侵鄭滑外城及陳許鄧等州月餘復歸舊渠

昭宗乾寧三年河圯於滑州朱全忠決其隄因爲二河散漫千餘里案唐二百八十餘年雖有河患非決卽溢河道無大更變且河朔諸地天寶以後久屬藩臣縱有河事亦不聞於朝廷其後梁貞明四年梁將謝彥章攻楊劉決河水以限晉兵自酸棗東漫延百餘里金隄年久就堙遂屢爲下游曹濮之患雖旋經唐人堵塞未幾復壞至晉天福二十二年之間河決九次則梁人之過也

晉天福六年九月河決中都冬十月河復決滑濮至出帝開運元年六月河仍決滑州環梁山入於汶濟經過之地壞田廬無

算至十月始歸舊瀆

周世宗顯德六年河決原武而河流支河愈多蓋五代五十五年之間有河患者十九年良由於梁人決河之後河經平地多出支河雖一時水息而一經漲溢四出爲患

按唐初水患多在河陽三縣其後多患在河北滎澤以西均仍故道至唐末之際頻年水溢自酸棗以北河勢反弱當時治河之策不見紀載要皆任其遷徙任其復歸而不能盡力以治之則固昭然可知也

自東漢魏晉南北至唐末之河均合濟漯二河東行黎陽以北之古大河遂終難規復

禹貢錐指曰隋志兼綜南北朝事而無河渠唐新舊二史五代

史亦不志河渠事多缺略今按唐有河北道河南道以河畫界其自大伾以東河北魏衛澶博德棣滄七州河南滑濮濟齊淄五州皆瀕河郡也謹摭元和志寰宇記所載各縣界之黃河略爲詮次以補史志之闕黃河自汲縣南胙城北東北逕靈昌縣北又東北逕白馬縣北其北岸則黎陽又東逕頓丘縣南又東逕清豐縣南其南岸則濮陽縣又東逕臨黃縣其南岸則鄆城縣又東北逕朝城縣東其東岸則范縣又東逕范縣北其北岸則武水縣又東逕陽穀縣北其北岸則聊城縣又東逕平陰縣北又東逕長清縣北其北岸則平原縣安德縣又東逕臨邑縣北又東逕臨濟縣北又東北逕鄒平縣西北其北岸則滴河縣厭次縣自此以下有新舊二道舊東北逕蒲臺縣南又東北入

海景福後自厭次縣界決而東北流逕渤海縣西北又東北至無棣縣東南而東注於海以今輿地言之濬縣清豐觀城聊城平原陵縣商河齊東武定蒲臺利津諸州縣界中皆唐歷五代以迄宋初黃河之所行也自王莽始建國三年辛未河徙由干乘入海後五十九歲爲後漢明帝永平十三年庚午王景治河功成下逮宋仁宗景祐元年甲戌有橫隴之決又十四歲爲慶曆八年戊子復決於商胡而漢唐之河遂廢凡九百七十七歲

宋

自五代楊劉之決至周顯德中李穀始修塞楊劉經陽穀抵張秋以遏之豫省水患漸息然決河不復故道離而爲赤河

宋太祖乾德三年河決開封府濫陽武河中府孟縣中渾城復壞至乾德四年詔懷州鄭州開封府衛等沿河州郡長吏并兼本州河隄使太宗興國五年治衛鄭等隄由滑州道澶濮曹濟東南至彭城界入淮

至仁宗時商胡河決自魏之北至恩冀乾寧軍入於海嘉祐八年河流派於魏州之第六埽遂爲二股河自魏恩東至於德滄入海是謂東流自二股河行一百三十里爲魏恩德博之境曰四界首河四界首者古大河所經溝洫志所謂平原金隄開通

大河入篤馬河至海五百餘里者也

神宗熙寧十年河由澶州曹村澶淵南徙東匯於梁山張澤濼分爲二一合南清河入淮一合北清河入海而北流遂斷絕是爲熙寧之變

自商胡決後至熙寧河徙澶淵而原武陽武之間屢有河患是年八月河決鄭州元祐八年內黃口河決而元符三年河復決開封府東之蘇村直至欽宗靖康間河決陳留四十餘日始由開封府尹宗澤命判都水監陳求道治之水復故道

有宋一代之變遷以商胡爲鉅而澶州次之所謂由北清河入海卽今大清河自東平歷東阿平陰長清齊河歷城濟陽齊東武定青城濱州蒲臺至利津入海者也由清河入淮卽泗水故

道今會通河自東平歷汶上嘉祥濟寧合泗水至清河縣入淮者也而皆不在豫境自是厥後河道遂日南徙矣

北宋以近在京畿故於豫河設官分職南宋而後重在東省故滎澤陽武之間迭有河患而旋修旋決竟不爲永逸之計其後地非宋有更不足責矣

禹貢雖指曰宋初河道與唐五代略同歐陽修所稱京東故道是也景德元年河決澶州橫隴埽尋復修塞景祐元年又決橫隴遂爲大河之經流迨慶曆八年河又決州之商胡埽而橫隴斷流歐陽修謂之橫隴故道今濮州東東平州西范縣陽穀縣東南東阿縣北皆有舊黃河卽宋橫隴決河之所行也自長清而下則與京東故道合矣至和二年李仲昌議開六塔河引歸

橫隴故道從之嘉祐元年四月壬子朔塞商胡北流入六塔河不能容是夕復決溺兵夫漂芻藁不可勝計修河官皆請竄自是之後無復言橫隴者而京東故道遂廢

金

金始克宋兩河均歸劉豫豫亡河遂盡入金境數十年間遷徙靡定河南僅設六埽河北設十九埽專爲立官置屬以主之大定八年河決李固分流於單縣而豫境無患其時汴爲南京府所屬之延津封邱祥符開封陳留胙城杞縣長垣歸德府及所屬宋城寧陵虞城河南府及孟津河中府及河東懷州河內武陟同州朝邑衛州汲縣新鄉獲嘉河陽溫縣鄭州河陰滎澤武原汜水濬州閹鄉靈寶滑州白馬睢州襄邑等處均爲豫境黃河所經之流域均以長貳官提舉而以合佐管勾河防初衛州爲河水所壞乃命增築蘇門遷其州治其後以民情不願遷回卽仍其舊

禹貢錐指曰金時河流雖數遷徙而汲胙之間如故迨明昌五年八月河決陽武故隄灌封邱而東蓋河流至是又一大變矣按宋光宗紹熙五年甲寅卽金章宗明昌五年是炭河徙自陽武而東歷延津封邱長垣蘭陽東明曹州濮州鄆城范縣諸州縣界中至壽張注梁山灤分爲二派北派由北清河入海南派由南清河入淮卽泗水故道河匯梁山灤分二派入南北清河自宋熙寧十年始尋經塞治至是復行其道而汲胙之流遂絕下逮元世祖至元間河又徙自新鄉出陽武之南凡九十餘歲

元

有元之世始有河患者爲世祖至元九年衛輝路新鄉縣廣盈倉南河北岸決五十餘步八月又決一百八十餘步其勢不已雖由都水監丞馬良弼併力修完而河道南徙未修時距倉僅三十步修後南移五十餘步二十五年汴梁路陽武諸處河復決大抵黃河自孟津以東土性疏薄兼帶沙滷一失導洩之方則易致崩潰歸德以東之居民利河北徙有司不能遠慮使陂澮悉爲陸地東至杞縣三汊口播河爲三分殺其勢蓋亦有年歸德太康之間相次湮塞南北二汊遂使三河之水合而爲一下流旣不通暢自然上溢爲災自至元新鄉河決修復復決徙入陽武縣之南而新鄉迤北之河流遂廢至二十六年惠通河

成始以一淮受全河之水北流益微直至順帝至正時用賈魯之策始爲一勞永逸之計疏塞並舉挽河使東行以復於故道蓋自至正四年五月黃河北決白茅隄六月又北決金隄漫延千里至十一年四月始鳩工疏濬其間凡七八年之久一任河水橫流不能制止賈魯受命鳩工至七月而疏鑿成八月決水入於故河至九月而舟楫已能通行河復故道南注於淮奏功神速前古所無惜乎爲惠通河所窘逆河之性不能北歸所復者仍爲入淮之故道使魯生於漢武之世必能導河入於宿胥故道如史遷所謂復禹舊迹者豈徒與王景等烈哉

自賈魯引河南注以後濬滑汲胙之間無河矣新鄉獲嘉之間更無所謂舊迹矣導河入淮重在於運而豫境河患全河之趨

勢有不能兼顧之議

自金明昌陽武之決河水大半入淮而北清河之流猶未絕逮元世祖惠通河成全注於淮賈魯修復河自開封以東經陳留儀封考城曹單虞城碭山豐沛徐州合泗水東南經靈璧睢寧邳州宿遷桃源以至清河合淮水由安東入海此有元一代之河道也

禹貢雖指日至元九年河決新鄉廣盈倉岸時河猶在新鄉陽武間也不知何年徙出陽武縣南而新鄉之流絕據史至元二十三年河決突河南郡縣凡二十五處二十五年汴梁路陽武等縣河決二十二所水道一變蓋在此時矣元一統志殘缺僅存十之一二河之所經不可得詳謹撫近志各州縣界中見行

之河詮次如左黃河自武陟縣南東逕滎澤縣北其北岸則獲
嘉縣又東逕原武縣南又東逕陽武縣南又東逕延津縣南又
逕祥符縣北其北岸則封邱縣又東逕陳留縣北又東逕儀封
縣北又東南逕睢縣北又東南逕考城縣北又東南逕商邱縣
北其北岸則曹縣又東逕虞城縣北其北岸則單縣又東逕碭
山縣北又東逕豐縣南又東逕沛縣南其南則蕭縣又東逕徐
縣北與泗水合又東南逕靈璧縣北又東南逕睢寧縣北其北
岸則邳縣又東逕宿遷縣南又東逕桃源縣北又東逕清河縣
南與淮水合又東逕山陽縣北又東逕安東縣南而東北入於
海蓋自金明昌甲寅之徙河水大半入淮而北清河之流猶未
絕也逮元世祖至元二十六年己丑會通河成於是始以一淮

受全河之水凡九十五歲

明

有明一代亦重視運河蓋以始都金陵由北輪南繼都燕京由南輪北強抑河流以佐運道固不得謂之良策也

太祖洪武二十四年河由開封城北五里又東南由陳州項城太和潁上東至壽陽鎮全入於淮而賈魯河故道遂淤

又支流經鄆城兩河口漫東平之安山而元世祖時之會通河亦淤自黃河改徙汴梁北由鳳陽入河者爲大黃河其支流出徐州以南者爲小黃河

蓋明初黃河自汴梁分爲二道一出汴城西滎澤經中牟陳潁至壽州入淮一出汴城祥符東經陳留亳州至懷遠入淮其東南一道自歸德宿州經虹縣至宿遷出其東分五道一自長垣

曹鄆至陽穀出一自曹州雙河口至魚臺場場口出一自儀封歸德至徐州小浮橋出一自沛縣南飛雲橋出一自徐沛之中鏡山北溜溝出六者皆入漕河南匯於淮其後諸道先後均塞惟沛縣一道獨存

正統十三年河流爲二一自新鄉入柳樹由故道東經延津封邱入沙灣北流入張秋會通河一由滎澤漫流原武抵祥符扶溝通許清河尉氏臨潁鄆城陳州商水西華項城太康出豫境宏治時河忽北徙三百里白昂塞諸河口洶流入汴至宿遷小河口正德初河又北徙三里復至徐州小浮橋逾年又北徙一百二十里至沛縣飛雲橋又衝黃陵崗入賈魯河直抵豐沛推源正統十三年張秋之決實爲黃河逐漸北徙之證黃河之

決必經張秋以潰運明季以運河爲重而不紀大清河蓋河至張秋不及百里經東阿之山卽入大清河河流不能越山故每決必北徙每徙必近於大清河自金龍口之決塞決口數十處然後強引入淮又以河徙入淮終非正道乃自東平興濟鑿小金河十二道引水入大清河及古黃河以入海蓋逼河強使南行如是之難也

以上爲明季河流之大變遷其間洪武二十三年河決鳳池詔於歸德府鳳池設防汛而河流所至僅遙築隄以防之至二十四年因陽武之決而故道遂廢三十年河又決而南徙於陳州永樂八年河決開封舊外城遂圯因築土隄以防之宣德中河復決壞開封府隄折而南行自鄭州祥符陳留滎陽滎澤鄆陵

杞縣中牟洧川一帶田地多受其害直至正統張秋之決豫河始畧安靜然漲溢之患仍時有所不免景泰年間因原武之決縣城淪沒遷於河北二十里縣治之北邊而河流亦漸南徙而開封迤東之河轉北徙英宗天順五年河溢壞汴梁之土城復由甄城北門入城內民舍一空雖設法疏濬而城中堙沒亦非舊觀是年九月河復溢開封懷慶衛輝等府宣武河南睢陽三衛河流自武陟徙入原武而獲嘉之北遂絕憲宗成化十四年河決祥符之杏花營七月河決延津泛溢七十餘里河遂自延津徙入封邱而延津遂無河流弘治金龍口之決至張秋入運而陳留通許以南之河流遂淤其後弘治四年河溢蘭陽仍奪淮入海弘治十九年河決睢州屬之野雞岡由汴河徑入於淮

於是開濬李景高口支河引水出徐閭二年而復淤嘉靖十九年河決野雞岡由渦陽經亳州入淮二十四年復決野雞岡合泗入淮歸入於海萬曆三十年閏月河州黃河竭三月河決蒙牆寺入歸德商水南徙與淮水入洪澤湖至四十七年九月因牌沙岡之決由封邱曹單之間至考城復入舊河至懷宗末閭賊決宋家寨入汴城北門出東南城以入於渦陽

蓋自武陟河陰以西直至閿鄉靈寶兩岸多山河勢不急河陽諸郡自宋以後遂無河患河流所經循禹舊跡無所變遷自武陟河陰以東兩岸既無山阜亦無支河流入東經滎澤縣北又東南經原武縣南鄭州北又東南經陽武縣中牟縣北又東經延津縣南開封府治之祥符縣北自漢以降河患多在東北宿

胥之決瓠子之塞是也隋唐以降北道不行故河之患多在滎陽鄭州之西如河陽中渾城時決時復是也有明一代則自原武至歸德時有河患神宗以降則河患多自開封以東蓋下流不暢則上流不決必溢水性就下其患將自高而漸趨於卑固地勢之變易人力之疏濬堵禦有不得不順勢利導而時代之漸亦有以使之然也自開封東經蘭陽儀封陳留雖考之間以出豫境而睢州野雞岡奪淮之道亦曰就湮塞矣

張文端治河書曰河南黃河南岸自陝西潼關大閘縣境經靈寶陝州澠池新安孟津鞏縣汜水河陰至滎澤縣而始有隄工自此而鄭州原武陽武中牟祥符陳留蘭陽儀封考城商邱虞城至江南徐州之碭山縣界北岸自山西垣曲縣入濟源縣境

經孟縣溫縣武陟以至滎津縣而始有隄工自此而原武陽武
封邱祥符陳留蘭陽儀封以至山東曹縣界凡係開封府者南
岸屬南河同知管轄北岸屬北河同知管轄係歸德府者南岸
屬歸德府管河通判管轄北岸係山東曹單二縣界屬兗州府
黃河同知管轄

頁
三
十
三

三

黃河經過豫境各縣之沿革

黃河入豫境經閿鄉靈寶縣北北岸爲山西芮城縣南境

閿鄉漢屬湖城縣未有邑也至周宇文氏始於湖城北置爲閿鄉郡及縣廢於隋初開皇時復置閿鄉縣大業初屬河南郡唐屬魏州宋陝州以迄於明靈寶縣爲秦函谷關地漢爲宏農縣魏晉因之隋分建桃林縣屬陝州大業初屬河南郡義寧初屬宏農郡唐屬陝州天寶初乃改縣爲靈寶後皆因之

又東經陝州城北又東經澗池及新安縣北北岸爲平陸及垣曲縣境

陝州周周召二公所治春秋爲北魏晉滅之三家分晉魏

有之韓嗣得之而終入於秦屬三川郡漢宏農郡後魏置
陝州及恒農郡後周更置嶠郡隋初廢郡大業初廢州屬
河南郡義寧初復宏農郡號唐爲陝州天寶初改爲郡乾
元初復故天佑初升爲府命之曰唐興繼又設保義軍宋
仍曰陝州太平興國初改設保平軍仍曰陝州明興以州
治縣廢澠池戰國爲韓土入於秦漢初置縣以屬宏農郡
蜀漢時魏徙治蠡城晉世亦然後魏郡澠池後周易爲河
南郡大象時以郡爲洛州屬而廢縣隋後改治大塢城義
寧二年以屬宜陽郡唐初屬穀州貞觀初年移州治焉繼
又移縣治顯慶初穀州廢縣屬洛州宋以屬河南府金爲
韶州至元中復爲縣新安戰國爲西周秦爲新安漢縣之

屬宏農郡晉後魏屬河南郡東魏爲新安郡隋廢開皇時
爲穀州仁壽中廢且廢縣入東垣縣大業初復爲新安縣
屬河南郡義寧初仍爲郡唐置穀州貞觀初移州治縣改
屬洛州後皆因之

又東經河南府北北岸爲濟源縣南境

河南府禹貢九州之豫州周之故都秦爲三川郡漢河南
郡東漢以都之故置爲尹並置司隸魏晉相繼於此改爲
司州而仍尹如東漢劉宋亦然後魏爲洛州太和時都之
乃復魏晉之制改爲司州及河南尹東魏爲洛州如後魏
之初惟改尹爲洛陽郡後周爲東京隋初罷郡爲洛州煬
帝徙都於此曰豫州復曰河南郡唐初爲洛州顯慶初設

東都開元初改洛州爲河南尹天寶初年定爲東都後魏稱爲西都後唐都之仍曰東都後晉謂爲西京而仍府更置軍號曰德昌後改爲金昌府元爲河南路明河南府濟源周原地後更名軹東周爲畿內地春秋屬晉戰國爲魏秦漢皆爲軹縣地屬河內郡晉及後魏因之隋開皇十六年析置濟源縣屬懷州後屬洛州又屬孟州宋因之元初改縣爲原州尋復爲濟源縣屬孟州明屬懷慶府

又東經孟津縣北北岸爲孟縣南境

孟津漢爲平陰縣屬河南郡魏晉爲河陰縣地唐爲河清縣地仍屬河南府宋移縣治於白坡鎮金徙治孟津渡改孟津縣又升爲淘州州旋廢元仍曰孟津縣明嘉靖十七

年城圯於水始遷今治孟縣周武王會諸侯於孟津卽此地也春秋魯隱公十一年王以盟與鄭後屬晉爲河陽戰國屬魏爲垣雍地漢爲河陽縣屬河內郡高祖封陳滑爲侯國晉仍爲河內郡屬後魏因之隋仍爲河陽縣屬懷州唐武德四年置盟州於此八年州廢顯慶二年改屬河南府建中三年河陽三城節度使治焉會昌三年置孟州治河陽縣宋仍曰孟州亦置三城節度金亦爲孟州屬懷慶路改州爲縣以河陽縣省入屬懷慶府

又東經鞏縣北北岸爲温縣境

鞏縣周鞏伯邑戰國謂之東周漢置縣屬河南郡晉及後魏因之東魏屬成臯郡北齊屬洛州隋大業初移縣治洛

口仍屬河南郡温縣周爲畿內國戰國爲魏邑漢爲温縣
河內郡屬也晉後魏皆然東魏屬武德郡北齊廢隋仍置
懷州唐武德四年置平州尋復故顯慶中改屬洛州會昌
中又改屬孟州宋後皆因之明初改屬懷慶府

又東經汜水滎陽縣北北岸爲武陟縣南境

汜水古東虢鄭之制邑曰虢魯昭元年魯侯與諸侯之大
夫會於虢又名虎牢秦屬三川郡漢置成臯縣屬河南郡
魏晉因之劉宋於此置司州北魏秦常中置豫州後又置
豫州於汝南以虎牢爲北豫州太和十九年改置東中府
以縣屬滎陽郡東魏天平中復置北豫州兼置成臯郡治
焉後周置滎州隋改鄭州皆以此爲治所開皇十八年改

成臯曰汜水縣大業初屬之滎陽郡唐初仍屬鄭州顯慶
中改屬洛州垂拱四年改曰陽武神武初復曰汜水會昌
三年改屬孟州宋洛州元豐初復屬孟州金屬鄭州元明
因之滎陽古東虢國漢置滎陽縣屬河南郡晉置滎陽郡
北齊改郡曰成臯隋初郡廢以縣屬鄭州唐因之天授二
年分置武泰縣屬洛州尋又併入滎陽而改武泰神龍初
復故制仍屬鄭州後皆因之武陟漢山陽縣地屬河內郡
隋開皇十六年析修武縣置武陟大業初廢唐初復置兼
置陟州州旋廢以縣屬殷州貞觀初改屬懷州宋因之明
亦如宋制

又東經河陰滎澤縣北

河陰本汜水滎澤二縣地唐開元二十年析置河陰縣屬河南府會昌三年改屬孟州宋因之金元明屬鄭州滎澤漢爲滎陽縣地晉屬滎陽郡隋開皇四年置廣武縣仁壽初改爲滎澤縣屬鄭州唐因之宋熙寧中省入管城元祐中復舊元屬汴梁路明初改屬鄭州

又東經滎澤縣北北岸爲獲嘉縣

滎澤見前獲嘉周之修武地漢置獲嘉縣屬河內郡晉屬汲郡後魏因之後周置修武郡隋廢郡開皇末置殷州大業初州廢仍屬河內郡隋末王世充復置殷州唐武德二年李厚德以州來降貞觀初州廢以縣屬懷州宋因之明初改屬衛輝府

又東經原武縣北陽武縣南

原武漢屬河南郡晉省後魏復置屬滎陽郡東魏改屬廣武郡北齊省縣隋置原陵縣後復曰原武唐屬鄭州宋熙寧中省入陽武縣元祐初復置金屬鄭州元因之明初改屬開封府陽武秦博浪沙地漢置陽武縣屬河南郡晉屬滎陽郡東魏屬廣武郡北齊省隋復置屬鄭州唐因之五代以下屬開封府

又東經開封府城北封邱縣南

開封府禹貢豫州故域春秋爲鄭地戰國爲魏都秦屬三川郡漢置陳留郡晉爲陳留國後魏亦曰陳留郡東魏置梁州及陳留開封二郡北齊以開封省入陳留後周改梁

州爲汴州隋廢陳留郡大業初并廢州分其地入滎陽梁
潁川等郡唐初置汴州天寶初改陳留郡乾元初又爲汴
州興元二年自宋州徙宣武軍於此朱梁建都升東京開
封府後唐復爲汴州宣武軍晉復都此仍曰東京開封府
漢周皆因之太祖復定都焉金曰汴京廢主亮改曰南京
宣宗珣遷都焉元曰南京路至元二十五年改汴梁路明
洪武初建北京於汴梁復曰開封府封邱古封父國左傳
賜封父之繁弱是也漢置封邱縣屬陳留郡後漢初平四
年袁術屯封邱曹操自湮城引兵擊走之晉屬陳留國大
興三年祖逖遣其將韓潛屯於此旣而石勒遣石虎引兵
南侵封邱而遷後魏仍屬陳留郡北齊省隋復置屬滑州

唐汴州清屬開封府

又東經陳留及蘭陽縣北北岸接直隸長垣縣境

陳留春秋爲留地屬鄭後爲陳所并故曰陳留秦置縣漢爲陳留郡治晉陳留國治小黃縣廢入焉隋開皇六年復置屬宋州後屬梁郡唐初屬杞州武德四年屬汴州五代屬開封府後皆因之

又東經儀封廳北北岸接東明縣界又東經睢州北北岸爲考城縣

睢州春秋宋陳二國地秦置襄邑縣漢屬陳留郡晉屬陳留國劉宋屬譙郡後魏屬梁郡北齊屬陽夏郡隋屬宋州唐初屬杞州貞觀初屬宋州宋屬開封府崇寧四年升拱

州建爲東輔大觀中廢政和四年復置金改譙州元因之
明初以州治襄邑縣省入考城周戴國春秋魯隱公十年
鄭取戴改名穀城秦置穀縣漢高祖封祕彭祖爲戴侯於
此後爲甯縣屬梁國東漢章帝改名考城屬陳留郡晉省
惠帝時復置屬濟陽郡宋因之後魏改置考城縣屬北梁
郡北齊省入成安縣隋開皇十六年復置屬宋州唐初置
東梁州尋廢以縣屬曹州五代晉屬開封府宋因之崇寧
中改屬拱州大觀中仍屬開封府金復屬曹州又改屬睢
州元明因之

又東南經商邱縣北北岸爲山東曹縣界

商邱古蘭伯之墟春秋宋都也秦置睢陽縣漢因之梁國

都於此隋改縣曰宋城後因之金人復曰睢陽明初省嘉
靖中置今縣屬歸德府

又東經永城夏邑縣北北岸爲單縣境

一永城春秋芒邑地漢爲芒縣屬沛郡高祖封酈路爲侯邑
後漢改芒曰臨睢屬沛國魏廢晉爲譙郡蘄縣地隋末置
永城縣屬譙郡唐屬亳州宋因之元改屬歸德府夏邑戰
國下邑地秦屬碭郡漢置下邑縣屬梁國晉因之劉宋兼
置梁郡於此後魏初屬梁郡孝昌二年於此置碭郡隋屬
亳州開皇十六年改屬宋州唐宋因之金始改夏邑縣仍
屬宋州元初并入睢陽縣尋復置屬歸德府明因之

又東經虞城縣北出豫境北岸亦單縣境

虞城古虞國禹封商均於此漢置虞縣屬梁國晉因之後
魏屬沛郡改曰蕭縣北齊省隋開皇十六年置虞城縣屬
宋州唐武德四年置東虞州旋廢仍屬宋州五代梁屬輝
州宋仍屬曹州金廢元復置屬東平路後屬濟寧路明初
改屬歸德府

其故河經延津縣西北經衛輝府濬縣彰德府臨漳縣出豫境
延津鄭之廩延秦置酸棗縣漢屬陳留郡晉因之後魏併
入小黃縣後復置屬東郡北齊併入南燕縣隋初復析置
酸棗縣屬滑州大業初改屬滎陽郡唐復屬滑州五代梁
屬開封府宋改延津縣金置延州旋廢復爲延津縣衛輝
府禹貢冀州之域殷紂所都周分爲邶鄘衛後以衛封康

叔居河淇之間故商墟也其後狄滅衛齊桓更封之於河
南楚邱卽今滑縣地而河內殷墟尋屬於晉戰國屬魏秦
爲三川郡地二漢爲河內郡地曹魏置朝歌郡晉改汲郡
後魏因之東魏置義州後周改衛州隋初廢郡仍曰衛州
大業初復爲汲郡唐復曰魏州天寶初亦曰汲郡乾元初
復故宋仍曰衛州金因之亦曰河平軍元曰衛輝路明爲
衛輝府濬縣春秋衛地漢置黎陽縣屬魏郡東漢及晉因
之石趙置黎陽郡後魏屬汲郡孝昌中分置黎陽郡東魏
又置黎州隋初州郡俱廢縣屬魏州開皇十六年復置黎
州大業初州廢仍屬汲郡唐初復置黎州貞觀十七年州
廢仍屬衛州五代晉改屬滑州宋初因之雍熙中改屬澶

州端拱初建通利郡天聖初改置安利郡熙寧三年復爲
黎陽縣屬衛州元祐初復爲通利郡政和五年升爲濬州
亦曰濬州軍尋又爲平川郡金皇統八年改曰通州天德
四年復曰濬州元初以州治黎陽縣省入屬正定路至元
二年改隸大名路明洪武三年改州爲縣以屬大名府也
彰德府禹貢冀州之域殷河亶甲居相卽此春秋爲晉東
陽地戰國爲魏之鄴地後屬趙秦爲邯鄲郡地漢爲魏郡
東漢末冀州徙治焉曹魏以受封於此稱爲鄴都晉仍爲
魏郡屬冀州後趙石虎前燕慕容儁並都鄴後魏仍爲魏
郡兼置相州東魏都此改司州北齊又都之後周仍置相
州及魏郡隋初廢郡煬帝復改相州爲魏郡唐仍曰相州

天寶初改爲鄴郡開元初復爲相州五代晉天福三年置
彰德軍宋仍爲相州金爲彰德府元彰德路明初復爲彰
德府臨漳漢魏郡鄴縣地晉建興初諱鄴改爲臨漳時鄴
已陷於劉聰石趙仍稱鄴縣東魏天平初分置臨漳縣屬
魏郡唐屬相州會昌三年省入肥鄉縣尋復故